

# Mahathir: Kukuhkan lagi Umno

PULAU PINANG, Khamis — Timbalan Perdana Menteri Dato Seri Dr. Mahathir Mohamed mengingatkan ahli-ahli UMNO, kejayaan parti yang dicapai sejak 21 tahun dulu akan hancur lebur jika mereka tidak berhati-hati untuk terus memperkokoh parti itu.

Beliau berkata, apa yang penting bagi orang-orang UMNO khususnya, orang-orang Melayu amnya, ialah memperingati dan bersyukur atas perjuangan UMNO yang telah mengekalkan teraju pemerintahan negara selama 21 tahun dengan keadaan aman dan damai.

Ini bukanlah satu kejayaan yang mesti kita laung-laung, megah dan bangga-banggakan, tegas beliau.

Sebaliknya, kata beliau, kejayaan ini memberi perangsang kepada kita ke arah berusaha lebih giat dan gigih lagi terutama mengokohkan parti UMNO yang sama-sama kita perjuangkan.

Dato Seri Dr. Mahathir menegaskan demikian dalam per-

utusannya sebagai penaung perayaan hari kebangsaan ke-21 UMNO bahagian Tanjung yang akan diadakan pada Sabtu ini di sebuah hotel terkemuka di sini.

Beliau berkata, tanpa keutuhan UMNO kejayaan yang kita nikmati selama ini tidak akan terjamin dan ada kemungkinan akan hancur jika kita tidak berhati-hati.

Dalam perutusan yang sama bekas Perdana Menteri Tunku Abdul Rahman Putra berkata, UMNO merupakan parti tulang belakang negara.

Katanya, di bawah pimpinan UMNO taraf kedudukan rakyat bertambah baik jika dibandingkan dengan sebelum merdeka.

Oleh yang demikian setiap ahli UMNO dan rakyat patutlah bersyukur kepada tuhan atas nikmat pemberiannya.

Beliau memuji peranan yang dimainkan oleh UMNO bahagian Tanjung yang memberi kemenangan kepada calon Barisan Nasional.